

夢梅花館詩鈔

蜀史題



邱清琛同志惠存

李禧



尚雲山房詩存

李正華先生撰

逸學寺禧題



問雲山房詩存

廈門李正華撰

正華先生字望之清道光五年同安拔貢居廈港掌教廈港紫陽書院此冊
為吳景川學友所貽冊有其世父渭竹丈小印據小梅詩存稱問雲山房詩文
甚富藏其壻侯錫恩家李侯二家後人已無識者知問雲山房詩已湮沒久矣
渭竹丈從吳小梅先生學詩而小梅又為望之先生再傳弟子其詩脈一貫如
此廈市志采問雲山房詩頗多其詩風流瀟灑時有警句不及今刊出恐又遭
散失茲附入拙集卷首以表崇拜之忱

一九五六年瓜秋後學李 禧謹識

惜花詞

芳菲平視許朝朝對此能令意也消花影似知人愛惜耐
寒耐冷度春宵

昆雲山房詩存
拳帷睡起報新晴鈴索丁東聽有聲莫遣先時便零落令人怪汝不多情

好花總亦當人看駐景神方檢較難一事至今知負汝不曾沉醉倚闌干

春風一度便天涯私怨東牆日影斜誰解癡心能似我惜花須是惜殘花

南普陀避暑

得地能消暑陀山路幾重三生傳好夢五老揖前峯留客仍依竹健人欲訪松真情相賞處再莫笑疎慵

不是白蓮社何妨一醉來人皆因酒至景恰對花開舊句城連有

去歲二舍弟芸田亦與石春郭葉若淑陳爾柔賦詩于此

前身古佛猜攢眉詩早就為被夕

陽催

和仲弟芸田自題小照原韻

蓬瀛一墜便凡塵生世多情累此身芳草關心原有託國
風好色本非真如何楚客悲秋夢卽是蘇家聽雨人日向
芳菲叢裏坐拗花爭得強來親

牆東有客笑登徒鏡裏秋風改貌癯善舞休憐長袖影愛
花爭寫折枝圖深宵我寄三生夢展畫君甘百日呼同向
屠門思大嚼如何所好各從吾

送薛岵亭夫子

一塵不染想襟期獨坐冰廳積牘披循吏自應看史筆經
生兼喜得良師雄文家世能扛鼎遺愛流傳欲繡絲纔恨
來遲更去速私心還望返幃帷

送陳心沅孝廉入都

三條燭影一條鞭上國觀光羨少年驚座孟公交恐後渡
江孫策氣無前吟懷自古江山助得意斯人雅頌傳感愛
閑雲思出岫一迴追憶一纏綿君勸予兄弟入都求仕
時不能從心甚感之
六千里路走風塵努力韶華愛惜身好友自然深冀望長
途端不恨艱辛多時裁就官家錦此去遍游上苑春若向
蓬山山上立應遲我作後來人

秋海棠

最輕盈處最風流不買燕支只買愁伴却黃昏應有恨生
憎薄命總宜秋綠陰恰是新晴護紅雨仍教好夢留似怨
美人遲暮意等閑相見亦低頭

青霞白石幾安排冷艷悠然付小齋自覺多情迴夕照終
憐無語惜天涯神仙隊裏思花骨風雨樓頭寄遠懷試問

捲簾依舊否招魂永夜向空階

小紅狼藉褪殘粧秋雨秋風總斷腸空谷自憐傾國色仙
家難覓返魂香休誇羅綺新增態只合溫柔老此鄉人面
何如花面好有人惆悵對斜陽

芳情脉脉却無言珍重名花靜掩門一點檀心秋共訴三
分弱態醉留痕多情似染湘妃泪顧影偏離倩女魂莫怪
西風太輕薄望夫石畔許移根

秋懷十首

存九

不是悲秋客高歌一代中江淹曾夢筆殷浩慣書空往事
隨流水何人擅古風當前傳好景妙曲托梧桐
詎有分陰惜堂堂白日馳工愁兼善怨嘆老更嗟卑一笑
猶如此千秋不可知幾回搔首問何處證心期

貧也原非病遭逢願已違藥曾名獨活烏亦賦催歸顧影何妨瘦人情但取肥撫懷深自惜極目悵斜暉

跼蹐空天地能容一酒徒應隨人笑罵更任鬼揶揄茶試盧仝婢詩交穎士奴城頭新月出有烏叫烏烏

故態狂奴在顏唐禿管題新詩驅草木舊夢隔雲泥一醉羞顛旭偷閑學懶嵇青帘知近遠獨酌喚偏提

竊擬陳思體詩成賦七哀六朝驚麗句一代笑粗才風引游仙夢人登避債臺招涼兼納□世變實悠哉

生平知己少悵望賦停雲佳景真無奈秋情孰與分感恩呼負負每事欲云云其奈情難慰空嗟日又曛

壯志銷磨盡秋蟲號可憐怨悱宜小雅哀樂感中年濁酒還堪醉冷灰詎不然隨人仍作計勉矣祖生鞭

幾度歡場過無情又有情牆花疑漏影山鳥自呼名解佩
殊堪贈彈碁問不平此生已如此何必問來生

冬日偶成

捲却疎簾細雨斜一番景色到山家園梅蕊放疑留雪籬
菊枝殘尚有花別具蕭騷饒古趣不妨冷淡作生涯荒寒
鎮日無人問詩債仍逋酒債賒

消寒窗下寫春圖。北地燕支寄買無。何處問天懷李白。每逢岐路泣楊朱。逃名直欲鵬高舉。入世任從馬亦呼。私念苦吟能太瘦。一時梅影伴清癯。

讀賡堂師臺陽定陶二集率呈

論詩爭比論兵難一例休將紀律干纔讀東瀛新發軔知
公身可將吟壇

兩番戡亂具通才不作風塵俗吏猜公道持論傳賊口遙

遙認得好官來

定陶遇亂教匪以公好官戒勿相犯

報功公竟讓人先尸祝生祠媲美昔賢

定陶人為公建立生祠

異日循良看

史筆新詩絕勝勒燕然

扶輪講席乍開時舊事深談最可師吳下阿蒙思刮目春

風坐我豈嫌遲

題貞一齋詩後

家玉洲先生著

三吳屈指數才華風雅依然屬我家記否紅牋抄寫遍半

生佳句付梅花

先生少有梅花詩十首一時傳誦

蓬苑風裁格韻存孕含元氣了無痕隨園後輩猶知己不

獨義門與匠門

喜雲梁師到廈

不見鷺門月回頭十二霜舊時多伴侶小別已滄桑人喜
從天降情應比地長一燈文字願猶記昔升堂
滿棹風濤急來傳海上琴每當中酒日能悟小乘心顧我
慚雕木如公合鑄金酬恩空有泪不獨感升沉

檢詩

檢較名人集高風幾度攀飲醇能自醉情重覺如山壯士
弓偏碩參軍語不蠻自憐覆瓿者儘數待教刪

賣文

聲律羞傭丐賣文自榜門庸生甘自署餘子敢稱尊臣朔
工諧謔君房妙語言何人能諛墓鴻爪印泥痕

種花

闢得數弓地呼童自課花雅宜居士號

費元祿自號
種花居士

恰稱野人

家抱甕當春出荷鋤對月斜閒時應索句高詠手頻叉

賞酒

消愁拚一醉羞澀看囊錢杯止論三百價休問十千索逋情忘矣書券興悠然擬掛杜陵債尋常到處便

素心蘭

折馨贈處寫幽襟檻外芬香見素心空谷月明人乍到小亭秋淡夢偏沉紅塵渺渺應相謝玉骨珊珊總不禁我亦多情託君子依然晨夕共追尋

贈曾徽如

四座驚嗟對引毫上床有客敢稱豪登筵愧我三年長同調輸君一曲高文是江淹揮采筆交如程普飲醇醪自憐籬下□聲咽得着虛懷語總褒

幾年客路與征篷來往飄然一扇風奇數恥為三別壁雄
才爭挽六鈞弓猶思姓字青雲附幸喜追陪白眼空車笠
論交應記取有人高臥碧山中

題三舅氏森箸遺照

移情只自刺舟還猶是低迷海上山

圖名山水移情用
伯牙刺舟故事

對舅不禁

頻憶母愧無彤管寫慈顏

自憐酷似何無忌數到知音鍾子期彈不成聲空一慟雲
床忍憶置琴時

曉粧四詠

和林際廷
之作

印月奩初啓依依立鏡前顏容消瘦甚爭肯受人憐
委地綠雲擾輕粧上小樓牡丹新樣好倚檻學梳頭
曉起粧初罷低聲喚侍兒摘花來貼鬢儂愛小斜枝

梳頭
插花

絕代誰能識鉛華易混真明知汚顏色恐不動時人

傳粉

秋思迴文

珊珊影外檻多花斷夢愁人引月斜寒雨夜添秋韻冷殘蛩晚逼近窗紗

對菊迴文

芳花晚對恰情移夢憶秋香冷憶詩狂態醉看斜檻倚黃昏月影度東籬

賀季颺五十雙壽兼喜抱孫

姻門雅誼又師門

季颺予長姑夫之弟幼時曾與同窗

折輩行交夙好敦大衍圖開

東海月小春曲頌北堂萱不妨有酒仍謀婦且喜含飴更弄孫遠引南飛雙鶴舞鑑湖秋色值開樽

菊花

坐對東籬月幾更千秋知己是淵明自憐瘦影何妨淡看
到斜陽大有情出處也應敦晚節幽香原不損高名柴扉
掩處容吾傲空負西風過此生

哭咸蘭峯夫

治郡清河兩弟兄一身勞瘁為蒼生相從地下天難問永
作人間事不平旅櫬誰憐家萬里冰廳空對月三更傷心
白髮高堂老無復慎旃聽哭聲

兩年課士出公門說項逢人最感恩得袴昔曾歌叔度買
愁今定繡平原自憐白屋身雖賤為哭青天泪有痕不染
一塵看史筆他時剪紙待招魂

憶仲弟芸田

作客輸君早歸家讓我先歲華驚晚晚友誼大纏綿空向

天涯望頻聞旅舍遷音書長寄托看着祖生鞭

見說巫咸召居停少主人恰逢陳夕酒望斷古陽春壯志
經磨練長途役苦辛姜家留布被猶冀早抽身

春陰

養花天氣罩輕陰三逕空教屐齒尋雅有隔窗新柳色青
青對我報春深

新晴

初日晴明恰倚欄襲人花氣影珊珊捲簾正好登樓望留
得青山雨後看

踏青詞

小約隣家去踏青湔鞋恰好繡初成雨絲花片清明近添
得空山笑語聲